

1570 mam ex ipsorum adventu lætitiā significandā attineat , prætermittit . A nostra classe , quæ in binas deducta partes ingentium alarum speciem præbebat , inter sclopporum , ac tormentorum (quorum horribili fragore propinqui montes , ac maria resultabant) salutationes , militaresque plausus excepti , in portum deducuntur ; nullumque officii genus , quo testata in eos publica existimatio , ac benevolentia innotesceret , nostri reliquere . Nam Zannio imperatori Senatus præceperat , Columnæ , uti Pontificis præfecto , loco cederet ; Auriam , si velle sibi sumere id animadverteret , ne magnos rerum orsus levissima ex causa inturbaret ac perverteret , anteferreret . Ceterum , quod ad consilia capiendā spectaret , eorum sententiis perquisitis , quidquid e Republica videretur , ipse decerneret . Verum Columna , ut Zannio præiret , vix adduci potuit ; Auria ne tentavit quidem .

Dum hæc fiunt , meliore anni parte ad res militares pertractandas bellico apparatu , classe farcienda , sociorum auxiliis expectandis infumpta , hostibus tantum temporis relictum est , quantum ad res eorum componendas , expeditaque consilia capiendā suffecit . Selymus , qui , Mehemete ac Mustapha suadentibus , de sua in Cyprum profectioe sententiam mutaverat , Mustapham cum summo totius belli imperio terrestribus expeditionibus præfecerat : maritimarum rerum curam Piali , qui secundum a Mustapha dignitatis locum obtinebat , tribuerat : Hali ductandæ classis munus injunxerat . Erat is e Janizzerorum præfecto , quem *Agam* Turcæ vocant , ad maris præfecturam , Mehemete suffragante , sublati ; qui Piali infensus , ut ei honos ille a Selymo adimeretur , auctor fuerat , quod tantam in uno viro auctoritatem , ut inter purpuratos esset , & præfectus maritimus haberetur , minime tutam diceret . Haud multis interjectis diebus Mustaphas cum triremibus quinquagintaquinque , ac imperatoria quinquere mi , quam superbe adornatam , regioque apparatu instructam discedenti perhonorificæ significationis ergo Selymus detulerat , Pialim est subsecutus . Eubœam delati , Rhodum inde petiere . Ibi per speculatores de Venetæ classis statu , quæ acerba lue afflicta Jaderæ detinebatur , deque Hispanorum cunctatione edocti , nihil ultra timendum rati , cum

Mustaphas terrestribus copiis a Selymo præficitur .

Piali maritimarum rerum , Hali ductandæ classis cura mandatur .